



*Jumat, 02 Agustus 2024*

**Ogen: Sakaria 5:1-4**



**"Sumpah Palsu"**



**M**ulutmu adalah harimaumu. Istilah enda megati kal mbarenda ibelasken guru Bahasa Indonesia kami, paksa SMA. Kepeken atena ngatakenca gelah pentar kami makeken babah i bas melasken ranan. Sabap banci jadi pengerana e jadi erbahanca kita meherga banci ka e jadi ulu kebiaren ras bahaya. Mbue kal pasu-pasu banci ibelasken si erbahanca turah kegeluhen arah pengerananta. Tapi adi la kita pentar makeken babahta, banci ceda ukur teman bage pe ceda ukur Tuhan. Pedah pe 9 ken bas Taurat e me kap, ola ersumpah palsu. Sumpah palus e me perpadanen si ibelasken tapi la lit ketutusan bas pusuh nari guna nggenepisa. Enda sada dosa si mberat ngelawan Tuhan si setia bas padanna. Hubungan manusia ras Dibata lit bas iketen perpadanen. E maka i bas Tuhan kesetian nehken padan e tuhu penting. Padan e ibelasken i teruh sumpah. Maka adi lit kalak si ersumpah, tapi la dalankenna situhuna ia merendahkan nilai perpadanen si iakap Dibata pe meherga nge. Bangsa Israel i bas jaman Nabi Sakaria, erbahan dosa pelanggaren kerna sumpah palsu ras nangko. Enggo piga-piga tahun kalak enda mulihken ku Jerusalem arah Babilonia nari. Tapi bas kinatana kai pe la lit ibahanna, Rumah Pertoton Tuhan pe langa pajek-pajekkenna erbahanca la ia banci ersembah man Tuhan. Nangko mewakili dosa perbahanen si teridah, sumpah palsu mewakili dosa i bas pusuh si la tampak bas geluh si teptep wari. Tapi dampak dosa e mahanca sirang ras Dibata. E maka reh Tuhan arah pengenehenen kerna gulungen kitab si seh kal belangna, gelah inget bangsa e maka perpadanen ras Tuhan, adi bujur ipasu-pasu tapi adi jahat kena hukuman. Dosa si teridah ras si la teridah manusia, kerina tangkas i bas Dibata. E maka ula kita ersumpah palsu, simenekan kalak si deban alu tipu-tipu bage pe ncedai ukur Tuhan si seh kal setiana man banta. Hati-hati gunakan mulutmu, karena mulutmu adalah harimaumu.

*➤ I bas babah nari kap rehna tengguli ras racun*